



17351

kat.komp.

Mag. St. Dr.

P

Archiep. Leopold.  
Seb. Honoris paternus.

PANEG. et VITAE

Polon. 4<sup>o</sup>

№ 906



L  
R  
R

S



HONG

*Pater nvs*  
PATER NVS

ILLVSTRISSI 15 J MO PRINCIPI.  
REGNI POLONIÆ SE NATURI AC REVE-  
RENDISS. ANTISTITI ET DOMINO JOHANNI  
DEMETRIO SOLIKOWSKI DEI GRATIA  
ARCHIEPISCOPO LEOPOLIENSI;

A suo Monasterio Sieciechouienfi reuerenter &  
perquàm honorificè

HABITVS.



*Kloster* *Feb 16*  
Et à Sebastiano *Acerno* Sulimiriceñ, Consule  
Lublineñ, conscriptus.

Si Pater ego sum, vbi est honor meus? Si Dominus ego  
sum, vbi est timor meus? MALACH. I.

CRACOVIAE.

In Officina Iacobi Sibeneycher, Anno Domini

1602.



*Melchiori.* KRISTO PA-  
ZEMIENSKI, PRI-  
entis, atq; adeò toti Con-  
sultui eiusdem loci, Salutem in Dño IESV.

**G**LEBA ISTA AGRI SATIS, VT SCIS, LABORIOSI ET IN-  
grati, cum quo ego, parua cum vtilitate, non sine quorundam inuidia luctor, coëgit me  
Reuerendi Patres, vt sim grator erga Dominum meum, quàm ipse fundus erga me. Quam-  
uis enim mihi obtigit locus non satis vber: satis tamen, vt mea fert sententia, studiis nostris  
commodus; vti namq; satis tranquillus ac tutus. Venturus ad nos est primo quoq; tempore,  
vir illustri loco natus, Illustrissimus ac Reuerendissimus Antistes IOANNES DEMETRIVS  
SOLIKOWSKI DEI GRATIA ARCHIEPISCOPVS LEOPOLIENSIS &c. non decet  
nos esse mutos, inter tot gratulatores, nefas est vacuis manibus occurrere: cum ceteri ma-  
nus habeant occupatas in aggerendis Domino suo munusculis. Hanc igitur oratiunculam,  
cui nomen est HONORI PATERNO Conuentus nomine scripsi inter plurimas occupatio-  
nes meas, quibus assidue distrahor, vt sit animi nostri testis erga tantum virum; apud quem  
præstat me esse Gratosum, quàm vel mille Diplomatis communitum. Sicut ergo tu Illustrissi-  
mum olim Dominum, Dominum Cardinalem Lociordinarium nostrum Cracouiensem, facun-  
da, vt audio, favorabiliq; oratione exceperis, Diis ( vt aiunt ) hominibusq; plaudentibus: ita  
quoq; amabo te, apud Illustrissimum & Reuerendissimum Dominum, Dominũ Archiepisco-  
pum nostrum, inprimis infantiam istam nostram excusabis: deinde xenium vel potius offe-  
rentis voluntatem aliquot verbis ornare ne graueris. Vale. Lublini XVI. Calend. Aprilis,  
Anno M. DC. I.

Sebastianus Acernus Sulimiricen.  
Consul Lublinen.



# HONOS PATERNVS.



ON PARVM MVLTÀ SVNT HONORum ac dignitatum nomina & gradus, Illustrissime & Reuerendissime Antistes, IOANNES DEMETRI SOLIKOWSKI, METROPOLITANE LEOPOLIENSIS; quæ partim authoritatis, partim potentia, partim virtutis præferunt summam opinionem: & quæ non temerè, neque assentandi studio, neq; ambitionis vanitate, Diis & hominibus imposuit antiquitas: illa inquam antiquitas, quæ sobria, quæ sedata, quæ ab omni ambitu remotissima fuit. Sed vt mihi quidem videtur, ista nomina titulique, hominum ortibus, vitis & functionibus congruentes, propter duas maximè causas, & à bonis candidisque ciuib; imposita, à clarissimis viris libenter agnita, patienter tollerata, & amico silentio gratoque assensu, approbata sunt. Primam causam esse suspicor, vt illustres excellentesque viri discant & cogitent, se non iacere coniectos in sentinam & aphyam istam pigra imperitæque multitudinis: sed se cœlesti consilio & ope, vi Diuinæ benedictionis & clementia, virtutis meritorumque summa existimatione, & legitimæ concionis bonorum virorum testimonio, excitos & erectos esse supra hominē, & propius accessisse ad DEVM. Idque non in gratiā humanæ impotentia & ambitionis, non propter fastum, non propter admirationem plebeculæ, vt splendor & fortuna cuiusquam ostentui haberetur; sed vt caput honoratū, quo-



tidie reminisceretur officii vocationisq; suæ; & id esse cō-  
tendat, quod vocari libenter audit. Secunda verò causa  
est: vt ij qui subesse & imperata facere debent, vel in ali-  
qua parte obedientiæ sunt obstricti, admoneantur humi-  
litis, obseruantia, gratitudinisque erga nouum pinci-  
pem & magistratum. Pulcra sunt ista Illustrissime & Re-  
uerendissime Præsul, & re & specie grata; non potest e-  
nim natura sui obliuisci. Perpaucos inuenias ita Philoso-  
phos, quin illos oblectet honorum noua titillatio. Mor-  
bus hic est ingenii humani, qui dissimulari potest, non  
tolli, viuítque sub nube seueritatis, & sub humilitatis pal-  
liolo delitescit. Naturalis est ista gloriæ sitis: sic pauones  
expádunt pennas admiratorem nacti: sic plausu ac pop-  
pismatis delectantur & excitantur equi: sic pueri & pu-  
ellæ commouentur præconiolis parentum, præsertim, qui  
liberali sunt ingenio. Hæc pestis ex amore sui profecta,  
nobiscum adolescit, nisi vera illa & CHRISTIANA humi-  
litate temperetur. Inde sunt Romani illi prensatores  
& candidati, qui Comitia Curiata, cum ingenti spe & ma-  
ximo metu, expectaban; taurámq; & aleam popularem,  
diuersis ac miris artibus captabant aucupabantúrq;, iam  
Ædilitates, iam Censuras, iam Præturas, iam Tribunatus,  
iam Prouincias & Romanæ dignitatis amplissimum cul-  
men Consulatus. Etsi hoc assequi non licebat: saltē Pe-  
danei Iudices, & Patres Minorum Gentium, creari legiq;  
cupiebant. Et quàm magno desiderio ambirent: facile  
demonstrabat repulsarum pudor ac tristitia. Putabant  
enim se neglectos esse à Diis & ab amicis, & inimicorum  
ludibrio



Iudibrio relictos, qui spe frustrabantur, & honoris ineundi, & capeffendi magistratus. Regii nominis amplitudo & sublimitas, quamuis iam pridem apud Romanos mundi victores inuisa fuit, & paulatim abolescebat; qui Regulos plerumque, quàm Reges appellitare mallebant; gentium & populorum opulentorum Reges: tamē à plerisque; fœdis etiam conditionibus impetrata & retenta est, adulatione obsequiœ tantum non seruili. Cui em̃ qui aliquid legit, non contemnenda, imò non ridicula videtur esse imago illa parum sibi constantis animi? Rex inquam Bitiniæ Prussias, amicus Populi Romani, qui cum Nicomede filio Romam venit adulatum potius, quàm gratulatum. Et cum Populus Romanus captis triumphatisq; Gentio Illyriorum, & Perseo Macedonum Regibus, cepit esse valde formidolosus: vniuerso terrarum orbi, & auderet iam virga, quasi circino quodam Magico, circumducere & circumscribere mundi Monarchas: venit Prussias cum filio, ac Deos qui Urbem Romam incolebant, Senatūq; & Populum Romanum salutatum se dixit venisse. Pileatus & capite raso Legatis Romanis obuiam ire solebat, libertum se Populi Romani ferens. Romæ quoq; cum venisset in Curiam, submisisse se, & osculo limen Curiae contigisse, & Deos seruatōres suos Senatū appellasse dicitur. Quis igitur ad tantas sordes demisit Regem? Quæ causa eum coëgit, vt Deorum Fortunæq; Prænestinæ tam abiectus assentator esset? Nempe timor adimendi auferendiq; regni. Prætimuit enim potentiam Romanam simul & Fortunæ inconstantiam: cum vi-



deret Reges catenatos duci in triumpho, & florentissima Regna, Macedoniam, Epirum & Illyricum accessisse Romano imperio. Palpatur ergo mūdi victori populo: mulcet Fortunam, quasi rerum & actionum humanarum gubernatricem: vt sibi & filio, proprium perpetuūq; regnum sit, & salua maiestas, nullo fortunæ vento deminuta. Sicut enim honorificum iudicabat; esse, appellari, salutarīq; Regem: ita deforme miserabilēq; putabat, abire regno, cadere maiestate, iacere & ad æqualitatem ciuiū suorū recidere, fierīq; domi suę, vel parū vel adeò nullū. Hinc illē quoq; Ciceronis querelæ, dum Thesalonica exularet, Consulatu, Ciuitate, domo, libertatēq; motus & proscriptus. Ecquis (inquit) vnquā ex tam amplo statu, in tam bona causa, tantis facultatibus ingenii, concilii, gratiæ, tantis præsidis bonorum omnium concidit? Possum obliuisci qui fuerim, non sentire qui sim? quo caream honore? qua gloria? quibus liberis? quibus fortune? His etenim destitutus Cicero, vitam sibi insuauiem putat, ideóq; sibi tenebras, ideóq; solitudinem cariorem esse. Odi enim (inquit) celebritatem, fugio homines, lucem adspicere nō possum. Hi sunt animi, hæ sunt voces hominum, quos sua fortuna deiecit, & quos suus dolor ac mœror absorpsit. Quos aduersa fors ita debilitauit, vt iuuare prodesseq; non possint: & ita exaculeauit, vt mordere, nocerēq; frustra cupiant. Hæc est ambitio filiorum huius sæculi: hæc sunt animarum perturbationes, qui propterea excellere volunt, vt magnificè audiant & emineant, & metuantur. Paucos enim reperias, qui amari dili-  
giq;



giq; velint. Quotus enim quisq; est inter eos qui modò  
viuunt homines; qui paternitatis, bonitatis, humanitatis  
& caritatis nomen malit; quàm splendoris atq; potentiae?  
Quis vir est excellens, qui sibi tribui aliquid videt, &  
quem vêtus popularis afflauit, qui non præcupiat appel-  
lari Dominus quàm Pater? Quæ fæmina potens & Illu-  
stris est, quam non pudeat dulcis & amantissimi nominis  
materni? Quin et matronæ & aniculæ ditiores erubescūt,  
si quis eas matres dixerit: putant enim eo vocabulo fene-  
ctutem sibi & mendicitatem exprobrari: ita, vt venefi-  
cæ potiùs appellari patiantur, quàm matres: adeó corru-  
pta sunt mortalium iudicia & mores. O venerabile nomē  
paternum, vbi est dignitas tua? vbiq; est naturæ priuilegi-  
um? vbi est coiunctio foedusq; caritatis? ô Gratia nominis  
materni, vbi sunt elogia tua? Honora PATREM & MATREM.  
Ergo fons omnis honoris ortum habet à parentibus. Si  
non fuisset Pater, nō esset posteritas, non esset authoritas,  
non essent merita, non essent tot honorum discrimina,  
non essent vlli gradus dignitatis: Quis enim haberet ho-  
norem? aut cui? aut propter quid? prius enim opus est vt  
viuamus: deinde vt esset qui cum viuamus: tandem quo  
numero, quo gradu, & quo precio simus. Qui prior est  
tempore, potior est & iure. Quid autem prius est Paterni-  
tate? Quid honore & veneratione dignius? Sunt tamen &  
fuerunt multi, qui malunt id quod est natura posterius,  
quàm illud, quod est natura prius. Malunt esse vocariq;  
Domini, tyranni, reges, quàm Patres. Superbia vicit extin-  
xitq; caritatem. Omnes Regna, omnes Dominatum, multi

Diuini.



Diuinitatem & Maiestates meditantur. Minaces esse volumus, & potentes, & metuendi. Miracula spectaculaq; hominum potius esse affectamus, quàm pia & amabilia exempla dilectionis Christianæ. Ergo Paternum nomen iam penes solum DEVM remansit: Materno nomine Ecclesia sola Catholica & Apostolica non verecundatur. Solus DEVS est, per quem omnis paternitas nominatur in cœlo & in terra: sola Ecclesia mater est pulchræ dilectionis, in qua sunt multa spiritualia paternitatis, & vt ita dicam maternitatis & cognationis discrimina. Nam & qui baptizat, Pater est: generat enim, vel potius regenerat, per lauacrum τῆς παλιγγενέσεως, & renouationis Spiritus Sancti. Et qui offert obicitq; infantem vel catechumenum baptizandum, Pater est, & vas, & sponzor, intercedens pro eo qui baptizatur, & verbis conceptis, præeunte verba sacerdotis, satisdat. Et ea fœmina quæ administra est Sacramenti, applicatq; puerum ad fontem Sacrum, suo modo mater est: auget enim numerum filiorum DEI. Isti ergo sunt, non natura parentes: sed ministerio, sed fide, sed coniunctione caritatis: pariuntq; non ex sanguinibus, neq; ex voluntate viri & carnis: sed natos & procreatos ex DEO. Deinde qui docent erudiuntq; puerum in vera receptaq; fide Catholica, non minus parentes sunt; nam filium Ecclesiæ nouum & alumnum fidei, quasi palmitem nouellum, qui non ita pridem in CHRISTVM est insitus, nec dum benè coaluit; rigant, educât, & ferum emortuumq; corticem, glubunt ac purgant, ipsamq; plantam in obliquum deflectere vetant; sed vt rectà in sublime tendat



tendat & assurgat, diligenter assuefaciunt. Mox etiam illi qui de loco superiore concionantur, parentis quoq; vices obeunt, & iam non lacte, sed solidiore cibo reficiunt adultos: ut non tantum crescant, sed etiam operentur in domo DEI, & fructum afferant in patientia, & sicut vites in vineis & oleæ in hortis DOMINI, & oliuetis, multa vindemia & opima oleitate, respondeant votis cælestis agricolæ; & sicut feraces agri, collocupletent horrea summi patrisfamilias, magna copia rei frumentariæ. Porro, qui sacrum conuiuium procurant: qui parant epulas: qui stragulis adornant mensas: qui conuiuias inuitant: qui vitas conscientiasq; eorum excutiunt, & quasi in balneo spirituali sordes eluunt, ne temerè veniant hospites: ne pannosi deformesq; accumbant: ne conspectum hospitis inuitatoris offendat, sumouendi eiiciendiq; de conuiuiio: sed ut benè compti & benè vestiti gratiq; ingrediantur cænaculum DOMINI: certè optimorum ac sanctissimorum parietum loco habendi sunt isti. Nam & veræ nobis beatitudinis iuge triclinium aperiunt, & viam rectam ostendunt ac muniunt, quæ itur ad epulas cælestes, & leges conuiuii symposiiq; sempiterni nobis ob oculos ponunt: ne excidamus conuiuiio; sed ut perpetuò fruamur. Ipsi deniq; quod summum & maximum est, cibos nobis & alimenta sacrosancta, suis manibus præbent, ad æternam salutem, & ad spiritus pinguedinē. Hæc inquam est vera paternitas, quæ producit nunquam morituros, gignit filios ad æternitatem, procreat fælicitati, parat immortalitati, subducit iræ DEI, imponit in arcam Noë, Quæ



ducit ad portū, quæ purgat à peste & ab infectione totius generis humani, quæ manumittit à seruitute, excitat à somno, confirmat in periculis, & ab æternæ mortis capitali sententia vindicat. Natiuitas enim secundum carnem, non tam procreat, quàm exponit homines omnibus quotquot sunt calamitatibus & miseriis: vt prius incipiant nati infantes vagire, quàm lactere: & magnam ætatis partem exigant in somno, & vinculis, & sordibus, & vagitibus, & eiulatibus: indeq; per varias fortunæ factorumq; salebras, ad mortis extremam necessitatem peruenitur. Patris Adæ natiuitas ista est; non de hac nobis est sermo: de illa nos differimus, quæ ex aqua & Spiritu Sancto propagatur, & per quam efficimur gratiæ, non iræ filii. O ineffabili nexu coniuncta cœlestis agnatio; quibus te laudibus veham? quibus ornabo titulis? quo dicendi charactere tollam? quæ tibi regna conferam? quos honorum ventos? Omnia vincis caritate: omnia tuo desyderio antecellis: omnes amores & ignes longo post te relinquis interuallo. Ergo nihil paterno nomine suauius, nihil melius, nihil naturalius. Nam licet de ciuili humanaq; Paternitate loquar: Pater est author familiæ, columen domus, generis humani & Reipub: pro parte sua propagator & vindex, asserens naturam ab interitu, educator liberorum, exemplar morum, distributor operum, patrimonii conseruator & præsidium rei familiaris, author & conciliator caritatis. Qui si diues est, ornamentum est liberis suis: si pauper, solatium: si bonus, desyderium: si malus, (quamvis malum appel-  
lare



lare parentem, religio est ) præmium & corona patien-  
 tiæ est: si sapiens, præceptor & exemplū: si fatuus, piæ  
 dissimulationis occasio. Pater est quasi sol domesticus  
 & priuatus Monarcha, vnice diligendus & obseruandus.  
 Patrem qui non amat, monstrum est non homo, imò  
 ne animal quidem: videmus enim etiam brutis insitum  
 esse, vt obseruent parentes: & si non vera & rationali  
 caritate: tamen spe pabuli, & quadam quasi opinione  
 prouidentia. Qui nō amat parentem, furiosus est: exu-  
 tus omni humanitate: insuendus in culeum & abiici-  
 endus in profluentem. Qui non amat patrem, fera est;  
 imò vipera est: ideò nascens, vt pereat mater: ideò vi-  
 uens vt parentes prius enecti, quàm visi desinant viue-  
 re: quemadmodum veteres, (neoterici enim aliter sen-  
 tiunt) de viperarum ortu & crediderunt, & prodiderūt.  
 Patrem qui non amat; negat principia, & generis, & ca-  
 ritatis humanæ: contrauenit DEO: tollit naturæ legem:  
 cum hoc ego disputare non laboro; ad hos redeo, qui  
 sensum humanitatis nondum amiserunt: qui generis or-  
 tusq; sui non sunt obliti. Primum autem de iis dico, in  
 quorum auribus, vox Diuina non perfonuit: qui non  
 audiuerunt, non dico Moisen, sed ne de Moise quidem:  
 qui non viderunt CHRISTVM DOMINI. Non enim de-  
 fuerunt apud Ethnicos οἱ φιλοπάτορες ἢ φιλομήτορες natu-  
 ralis est ista Philostorgia. Inde illa magna vis amoris in  
 Vlysse, dum primum cōspicaretur parentem, quem toto  
 decennio non viderat: excussit enim ipsa natura lacry-  
 mas etiam nolenti ac dissimulanti filio: Sic em̃ Homer.



*Gestierant animi, per nares acre cucurrit*

*Robur: dum cari conspexerat ora parentis.*

*Oscula dat pia, circumfusus brachia collo.*

Conspectus enim patris in reduce filio, excitauit motū cordis subitum ac violentum: qui versus in fumum & amabilem quandam cordis amaritudinem, delatusq; ad extremas nares, commouet, elicitq; scaturiginem lacrimarum, ex subita læticia manantem: quam ne sapiens quidem & militariter educatus vir, tenere potuit, quin rueret in complexum carissimi parentis. Sic Æneas etiam apud inferos, agnoscit vmbra patris optatissimi: accurrit, prensat, & multo fletu gaudioq; prosequitur, in hunc ferè modum:

*Sic memorans, largo fletu simul ora rigabat.*

*Tēr conatus ibi collo dare brachia circum:*

*Tēr frustra comprehensa, manus effugit imago.*

Inde orta sunt illa pia cum primis & salutaria præcepta, vt illud sacri Poëtę Phocylidis Milesii, qui sic orditur sua præcepta de Religione, hoc est de Pietate erga Deum & Parentes.

*Principio venerare Deum, tandemq; parentes.*

Et illud Aristotelis, qui solo Deo excepto, Parentes primo loco & Præceptores ponit. Et alibi. Differre excellereq; patrē dicit omnibus aliis, quotquot sunt mortalibus, magnitudine beneficiorū: & quod est longè præstātius; quia Pater est cuiq; suus: αὐτὸς τῶ ἀναι, καὶ τροφῆς, καὶ παύσεως: causa, inquit, est filio; vt sit, vt alatur, vt erudiatur. id est; Pater est author liberis suis, vt nascātur & sint in na-

tura



tura numeroq; rerum : vt benè commodeq; viuant. Cibus enim pertinet simpliciter ad vitam : eruditio verò ad beatam vitam. Sed huiusmodi sapientum vocibus, referta sunt omnia veterum iuniorumq; scripta. Si verò Sacri codicis testimonia peruolutare vellem, dies me deficeret ; & priùs rauim contraherem dicendo , & aures tuas occupatas orationis tædio defatigarem, quàm eam rem, quæ in confesso est sanis omnibus, percenserẽ. Quid enim refert commemorare PATREM illum, illum ante omnem memoriam & ante homines natos primum & antiquissimum; totius familiæ nostræ, generis, nominis, & sanguinis humani profeminatorem? Quid alium Patrem & Genarcham, à quo profecta sunt absorpti, orbis, exhaustiq; mundi supplementa? à quo gentium populorumq; tyrocinia nata propagataq; sunt? à quo placati numinis cum vniuerso hominum semine foedus est ictum, & cœlestis arcus æterno iureiurando firmatum? à quo terrarum, agrorum, vrbiumue squalor & solitudo, nouis cultoribus est exornata, cæpitq; indies magis ac magis frequentari? à quo introducti sunt, & in possessionem totius continentis & insularum, missi tres illi Sem, Cham, & Iaphet, filii; tanquam Romani illi Triumuii: penes quos deducendarum Coloniarum & legis Agrariæ ius & potestas erat. Quid verò attinet referre tres alios Patres, & maximos, & sanctissimos, qui velut alii Triumuii deduxerunt nouam coloniam DEI, propagaueruntq; familiam IESV CHRISTI filii David, filii Abraam? Ex horum enim sacris connubiis, texebatur



series & filum, siue illa quam vocant, linea sanguinis  
egregii lectissimiq; : ac ducebatur per tres Tessaradeca-  
des patrum & abauorum CHRISTI, secundum carnem.  
Primæ Tessaradecadi præfuit Abraam, secundæ Dauid  
Rex, tertiæ verò Ieconias vsq; ad natalem eiusdem  
CHRISTI Domini & assertoris nostri, qui est nouæ pa-  
ternitatis & agnationis author, Pater futuri sæculi, & Prin-  
ceps pacis; & quo dignus non est is, qui plus illo diligit  
patrem & matrem. Ille enim & pater vnum sunt, & in  
hoc solo clamamus ABBA PATER, & ex quo omnis Pa-  
ternitas in cœlo & in terra nominatur. Ex cuius sangui-  
ne profluxit, ex cuius latere profultauit, ex cuius corde  
emicuit noua Eua, nouum coniugium, noua sponsa, no-  
uum puerperium, noua progenies. Ideò transfixus pro  
nobis, & vulneratus, & cruentatus, dicit ad sponsam: Ve-  
ni dilecta mea, in foraminibus petræ, in cauerna mace-  
riæ: vt intelligamus; quibus nuptiis, quo patre, quæue  
matre simus procreati. Nempè CHRISTVS dedit nobis  
potestatem filios DEI fieri, qui credimus in nomine eius.  
Et ipse dedit quosdam Apostolos, quosdam Prophetas,  
alios verò Euangelistas, alios autem Pastores ac Docto-  
res, ad consummationem Sanctorum, in opus ministerii,  
in ædificationem corporis CHRISTI, donec occurra-  
mus omnes, in vnitatem fidei & agnitionem filii DEI, in  
virum perfectum. Sed Ecclesia vnica sponsa CHRISTI,  
& vnica mater nostra, quæ os suum aperit sapientiæ, &  
lex clementiæ in lingua eius; quæ consyderat semitas  
domus suæ, & panem otiosa non comedit. Ita distinxit  
ordines



ordines & officia in amplissimis ædibus suis, ita instruxit  
castrorum suorum aciem ordinatam: ut unusquisque in  
ordine, in statione, & in vestigio suo maneat, & impera-  
ta faciat, militans in his terris: & palmam coronamque  
suam consequatur in cœlo triumphas. Sed prius, à victo-  
re immortalique cœtu, capiamus exordium. In cœlo qui-  
dem, ubi perpetuus triumphus agitur, stat à dextris Bea-  
tissima & Virgo, & Mater, & Regina, in vestitu deaura-  
to, superavitque gladium doloris, qui gloriosissimam a-  
nimam eius traiecerat, ineffabilique gaudio fruitur per  
infinitas & incircumscriptas æternitates. Ipsaque tri-  
umphatrix & sancta DEI Genitrix, & Sancta Virgo virgi-  
num, perpetuo Panegyrico salutatur. Quin etiam salu-  
tatur *κεχαριτωμένη*, id est: Tota quanta quanta est, nihil  
nisi Gratia est. Quid ni? Quia gratiæ Authore impletur,  
& ita quidem impletur: ut sit Gratia plena, ac refertissi-  
ma. Non sicut Eva plena temulentaque Furiis. Nam bac-  
chatur Caimo prægnans, & authore tyrannorum graui-  
da, fert utrum homicida foetum, maledictione distentum,  
sanguine fraterno contaminatum, spontaneo exilio in-  
famem. At Maria Mater gratiæ *κεχαριτωμένη*, CHRISTO  
Beatissima illa sarcina prægnans. Caimus erat furiosus,  
cuius facies concidit præ invidia & odio fratris. Item sem-  
per pauebat, pallebat, tremebat atque perpetuo trepida-  
bat: item continuus tremor fuit signum formidinis, & se-  
cum rixantis conscientiae. At CHRISTVS fuit princeps  
pacis, lenis & mansuetus, Speciosus forma præ filiis ho-  
minum, in cuius labiis diffusa est gratia. Ipsa est *χάρις*  
nostra,



nostra, quia vtero ferebat plenum gr̃atia & veritate. Et si quid ṽlquam gratiarum & charismatum reperitur: totum illius est, quem illa ferebat, & qui in illa totus habitauit. Adstant etiam secundo loco velut Prætorii milites DEI Sabbaoth, inuictissimi Spiritus, & iuges insomnesq; legiones ætherei cælestisq; exercitus, & hymnum glorię magni DEI, suauis & concordie reiteratione, concinunt & integrant, non sine liberali & amico tremore, & adoratione Diuinę reuerentię plena. Ibi quoq; lætatur veneranda Patriarcharum canicies, immortalis pollens auctoritate, multis agminibus filiorũ & filiarum stipata, & fælicissimos oculos in Deum defixa. Ibi sanctissimus inter filios mulierum, index & Baptista IESV CHRISTI de Virgine nati, monitor & præceptor pœnitentię, IOANNES. Ibi sunt illi duodecim Legati & caduceatores fidei tesseraq; Christianę, magniq; iudices duodecim tribuũ Israelis. Inter quos eminent quatuor scribę Sancti Evangelii, quibus Tablinum & Archiuum salutis nostrę conceditũ est: & penes quos actorum CHRISTI & nostrę religionis incolumis fides permanet. At verò, quis non admiretur vagientem & impollutam infantiam, & masculos innocentes, æquales coætaneosq; CHRISTI de MARIA nati? Quis non auidè spectet sanguinem in fontem lacti materno permistum? agnos immolatos agno, puręq; victimę puram victimam? Hi sunt tyrones æternęq; supplementa victorię cœlestis, & inseparabiles agni comites. Post hos etiam sunt valdè conspicui, roseo sanguine rubefacti & purpurati martyres adulti. id est: irre-

futa-

futabiles & irredarguti testes, qui constans veritati fideiq; Christianæ testimonium perhibuerunt: & lingua, & tormentorum cruciatuumq; diuturna perpessione, & sanguine, demum & vita: Quam fidem præstiterunt CHRISTO, tam viri quàm foeminæ, pars triumphi cœlestis pulcerrima & admirabilis; trabeis & stolis albis induti, capitibus coronas perpetuò virentes, & manibus insignia constantiæ suæ argumenta circumferentes. His adde beatos CHRISRI satellites & præcones; Doctores inquam, Episcopos, Monachos & Eremitas: quorum corda eructauerunt verbum bonum, dixeruntq; opera sua Regi. Quorum lingua sicut calamus scribæ velociter scribentis, confessa est confessionem magnam; & qui, cum potuissent transgredi, non sunt transgressi: facere mala, & non fecerunt: qui se castrauerunt propter Regnum DEI: qui inuenti sunt sine macula, & post aurum non abierunt: qui fecerunt res admirabiles in vita sua: qui animo, lingua, stylo & moribus; boni & continentēs, carnem suam crucifixerunt cum CHRISTO. Sed hîc quoq; visuntur, Illustrium Fœminarum chori: earum cumprimis, quæ propter amorem CHRISTI, perpetua se virginitate damnauerunt, à nuptiis & viris abhorrentes; dixeruntq; mûdo & lasciuiæ iuventuti: CONDITIONE TVA NON VTAR. Nupsi meliori. Paravi lucernam CHRISTO meo. Sponsalia contracta sunt, cū specioso forma præ filiis hominum, in cuius labiis gratia diffusa est: valete spōsi, valete proci Penelopes: obligauit me CHRISTVS arrha perpetua: intercessit annulus & corona sponsi



dignioris, cui regnum mundi & omnem ornatum seculi posthabui. Agnum sequor; nihil est mihi cum gregibus hircorum male olentium: valeant lusus: valeant iocci: valeant sciti, compti, delicati, faceti; coetus, missam facite sponsam Regis: de alio corpore triumphate. O sanctissima, puræ indefloratæq; virginitatis agmina. O ver odoratum castitatis æternæ. Nulla te metet æstas, nullus te carpet autumnus, nulla te coquet aut encabit hyems, nulla tempestas affliget, nullaque ætatis iniuria conficiet. Perpetuò florebis, perpetuum spirabis odorem, perpetuò inter rosas & lilia spaciabere: perpetuò Regem sponsum intuebere, cum illo te perpetuò oblectabis. Haftenus de virginibus, & quas castus innocens virginitatis sanguis purpuravit. Sequitur viduarum & matronarum gloriosus exercitus, exempla continentiae, manus eleemosynarum largitrices, linguæ mœstorum consolatrices, pedes Ecclesiarum frequentatores, fœminæ sanctæ, matres orphanorum, sacerdotum nutrices, ministræ pauperum, visitatrices infirmorum, corda Deo deuota, vasa timoris DOMINI, lampades misericordiae, coronæ virorum, educatrices liberorum, quæ per generationem filiorum saluatæ sunt, mulieres fortes, procul & de vltimis finibus pretium illarum. Deniq; sequitur populus, & Respublica cælestis turbæque magna, quam nemo dinumerare potest ex omnibus gentibus, tribubus & linguis collecta: quæ sempiterna voce succlamat AGNO aperienti librum vitæ, senioribusq; dicens: AMEN. Hi sunt illi fortissimi triumphatores &

periodo

periodo victorēs, qui superauerunt magnos cruciatus;  
& abluerunt suas togas, ac dealbauerunt eas agni sanguine. Ideò comparent ante solium Dei, & ministrant ei noctes atque dies in templo eius. Et ille qui sedet in solio, nunquam eis non erit præsens, & neque eos inedia, neq; sitis afficiet in posterum, neq; illos aduret Sol, neq; vllus æstus; quoniam agnus in medio solio sedens, reget illos, & deducet eos ad venam aquarum vitalium. Et absterget DEVS omnes lacrymarum guttas, ab oculis & genis eorum. Et hæc ferè sunt, quæ pertinent ad cælestem illam Hierarchiam, & Senatum Populumq; superne Hierusalem, victoria potitæ; & ad illas animas, quibus meritò dici possunt illa: vel his similia quæ Poëta dixit:

*Viuite felices, quibus est fortuna peracta*

*Iam sua: Nos alia ex aliis infata vocamur.*

Hæc sunt quæ pertinent ad Magistratum, & ad Paternitatem illam, quæ est in ciuitate DEI, & in ciuitate DOMINI VIRTVTVM. Redeamus deinceps ad Ecclesiam, quæ in his terris, quasi non domi; sed militiæ forisq; viuit. Stat in acie terrestris quoque naualisq; miles: delectus indicuntur: contrahuntur copiæ: conscribitur exercitus: terra mariq; trepidatur: certamen oritur: eminus tela congeruntur: signis cominus & viribus collatis configitur: vtrinq; manu feroq; cernitur. Hic boni imperatores, in parte præcipua laboris & periculi versantur, & milites suos cohortantur. Ignaui verò terga vertunt; alij vincunt: alij verò pigriores ea patiuntur, quæ vi-



etis accidere solent. Quis ergo præest his copiis? cuius auspiciis hæc res geritur? cuius imperio paretur? quis regit? quis animat? quis prælium restituit? quis pugnam senescentem redintegrat? Profectò non temerè vagatur miles: non quisq; sibi dux & author est: non, quod in tumultu fieri solet, delectus extra ordinem indicuntur. Sunt in Ecclesia, sunt in ista expeditione Imperatores: sunt Tribuni militũ: est equitatus: est & peditatus: sunt centuriones: sunt decuriones: sunt veterani: sunt quoq; tyrones: sunt procuratores, & velites, & lixæ, calonésq; deterrima belli colluies. Et quod maximum est; sunt **CASTRÀ**: victori receptaculum, victo perfugium, patria altera militaris, hæc sedes; vallumq; pro mœnibus, & tentorium suum cuiq; domus ac penates sunt. Est præterea Ecclesia **DEI** Sabaoth, terribilis; sicut castrorum acies ordinata: in eo præsertim negotio, in eo bello, vbi non est colluctatio aduersus carnem & sanguinem; sed aduersus Principes & potestates, aduersus mundi rectores tenebrarum harum, contra spiritualia nequitiae in cœlestibus. Hic mundus, est sedes belli: hic descenditur in æquum & in arenam, & in ea quæ vulgò vocantur torneamenta. Hoc bellum consciuit, & nunquam consciscere desinit caro nostra, familiaris proditor, domesticus hostis & perduellio. In nobis ipsis est ista seditio carnis, aduersus spiritum. Intra nos est ista pestis, hoc disfidium, hæc struma ciuitatis; cuius author & concitor est Diabolus, id est calumniator, delator & infernalis ille sycophanta. Bellum geritur cum Sathana, cum Gæniis nequam

quam, cum portis inferorum, cum spiritibus malis; quorum si fugatur vnus; redit in certamen, cum accessione virium, assumptis & adiunctis sibi, septem aliis spiritibus multò nequioribus. Et ita restituitur, pugna quotidiana iugèq; certamen. Hic ergo nobis Dux & Author opus est, si legitimè pugnare, & nō tumultuari, neque aërem verberare volumus. Adest igitur in Ecclesia DEI, Primatus Beati Cephæ, inuictissimi Petri: qui cadendi, surgendi, iterumq; pugnandi & vincendi, triumphandiq; nobis, & præceptor, & pater, & exemplum est. Qui non modò septies in die: sed septuagies septies congregandi cum hoste, monitor & author est. Vehemens em̄ hostis est ira: At qui remittit offensā proximo; toties, quoties illi forte bilem mouerit: magnum certè triumphum triumphauit. In Sede & Cathedra PETRI, semper est vnus Primas: in Ouili CHRISTI vno, semper est vnus Pastor: in familia Christiana, & in domo Dei, semper est vnus Paterfamilias. Pro castris Ecclesiæ, semper est vnus Imperator & Consul, cui ex fortitione Prouinciarum, vt Romani loquebantur (κλῆρος enim appellatur fors & regimen spirituale) obtigit, & vrbana administratio, & illa Prouincia, in qua est sedes belli. Et ille est summo totius Christianitatis consensu, Summus PONTIFEX ROMANVS. Constituendus enim est vnus principatus in Ecclesiastica Hierarchia, & non plurium. Nam vt inquit ille:

*Non est bona rerum*

*Summa penes multos: Ergo caput imperet vnum.*



Est enim in Ecclesia Dei sub vno CHRISTO, & super vnam Petram, Pastor pastorum, & Pater patrum, & rectorum Rector supremus & vnus: non tamen solus. Non esset enim Pastor pastorum, nisi alios pastores pasceret, eorumq; pascua, & mores, & oues interuiseret. Non esset Pater patrum, nisi alios, affectu non sanguine, patres institueret, eorumq; caritatem & sollicitudinem erga filios exploraret. Non esset rectorum Rector: nisi alios regentes regeret, de eorumque administratione cognosceret. Ille enim est qui aliquandò conuersus confirmat fratres. Vnus ergò; non solus tamen: sed cū aliis, & per alios, regit vniuersitatem CHRISTI fidelium; quem iure optimo, & Beatissimum, & Sanctissimum Patrem appellamus, & ad pedes Beatitudinis & Sāctitatis eius, aduoluimur & accidimus, eosq; cum summa veneratione deosculamur. O quàm speciosi pedes euangelizantium pacem, euangelizantium bona. CHRISTVS lauit ludæ plagiarij proditorisq; sui, & osculatus est, si non pedes; at certè labia fraudulenta & insidiosa: nos pedes CHRISTI in seruo eius & Patre totius Ecclesiæ, non osculabimur. Maria Magdalena lacrymis abluuit & absterxit capillis, & vnguento delibutos, identidem dissuauia est: nos pedes IESV in summo eius Pontifice, osculo non dignabimur? Maria mater nostri seruatoris, pedes vnigeniti sui emortuos, & frigidos, atq; clauis transfixos exosculatur, & lacrymis maternis affatim rigat: nos pollutissimis labiis, pedes nostri redemptoris non attingemus in Vicario: & vt ita barbarè, vere tamen

rè tamen & bona venia culminis Apostolici dicam, in  
Plenipotente eius? Quid ni faciamus? CHRISTVS DO-  
MINI est, summus Apostolus est in hac vita: PETRVS  
est; pro quo & pro cuius fide, fide illa immobili & pla-  
ne laxea, & Marpesia, mundi seruator pro nobis cruci-  
fixus, ardens & enixè orauit PATREM, ne deficiat vn-  
quam. Pro quo, Petro inquam, supplicauit æterno  
Parenti, ne cribraretur, & non excidat per incernicula  
Sathanæ: & ne ventilabro infernali iactata confessio  
eius, cadat inter paleas & quisquillas horrei Dominici;  
sed vt inter selectissima grana, præcedat paleas citrà re-  
manentes, & ab aduerso vento reiectas. Huius manum  
tenuit, ne summergeretur in mari: Hunc per Genium  
suum eduxit de carceribus & catenis, ne morte eius He-  
rodes adularetur Iudeis; & ne rumorū spectaculorumq;  
auidum vulgus, pasceret impurissimos, Principis Apo-  
stolorum supplicio, oculos. Nos vt par est, gratias agi-  
mus omnipotenti DEO; quòd Te nobis incolumem &  
quasi rediuium restituerit. Sed de summo Patre & Pa-  
store admonuisse, fatis esto. Cui præstò & ad latus est;  
lectissimus sacrosanctusq; Senatus, negociorum fidei,  
& Rei Christianæ Curia; sunt Illustrissimi Principes &  
& Presbyteri, in quibus vertitur cardo sanctæ Romanæ  
Ecclesiæ: sunt Patriarchæ: sunt Archiepiscopi: sunt Epi-  
scopi: sunt Abbates & Sacerdotum atq; Monachorum  
venerandus & religiosus ordo. Et hîc se iam nobis ape-  
rit campus, explicandæ laudandæq; functionis, & Pater-  
ni HONORIS TVI: quandoquidem ad eum gradum  
perueni-



peruenimus, dum Ecclesiasticam Hierarchiam percurri-  
mus, & quasi carptim attingimus: in quo TV REVE-  
RENDISSIME PRESVL ET ABBAS PIENTISSIME,  
multa nobis vigilantix virtutisq; Tvæ documenta dedi-  
sti, ac daturus es, si DEVS voluerit, multò plurima. A-  
deptus es em̃ tua mirifica pietate & insignibus meritis,  
in Ecclesia DEI nomen PATERNVN, nomen dulce:  
nomen caritatis & authoritatis plenum: nempè ARCHI-  
EPISCOPVS & ABBAS. Quorum alterum Præfectum Inspe-  
ctorum significat: alterum verò PATERN. Alterum est  
pietatis: alterum vigilantix. Factus es pater duorum  
fratrum, videlicet Esau & Iacob. Factus es Pater duarum  
sororum, Marthæ & Marię. Quorsum hæc? Nempè factus  
es Parens duarum Gentium, duarum familiarum, duarū  
vitarum. Altera familia TVA versatur in seculo: altera  
in Cœlo. Altera TVA classis remigat in mari: altera, iu-  
xta prouerbiū: IN PORTV NAVIGAT. Præfecit te Di-  
uina prouidentia duabus hominum vitis: alteri quidē  
actiuæ; alteri speculatiuæ. Sunt tibi filii spirituales ge-  
melli, ex vna matre & ex vno puerperio nati: Sed inten-  
tione, moribus & professione dissimiles ac diuersi. Est  
qui primus egressus est rufus, & in morem pellis hispi-  
dus, vocatūmq; est nomen eius Esau. Est etiā alter pro-  
tinus egrediens, & plantam fratris manutenens; & id-  
circo appellatur Iacob. Ouile enim tuum, quod pascis  
in mundo, varias & multiplices habet ouēs. Nam vita  
Politica, quæ & Secularis dicitur, varios habet ciues,  
varia ingenia & mores versipelles, & colorem rufum,  
sicut

sicut de Esau dicitur: id est, animos & cogitationes, ver-  
sutas. Ita enim filii seculi prudentiores sunt, Dominò  
teste. Sed alterū ouile tuū, quod est, vel certè debet esse  
extrà hunc mundum, id est: vmbra ista Monastica, quæ  
se mundo renunciaſſe profitetur, habet omninòq; ha-  
bere debet Iacobos tenentes plantam fratris; id est: ho-  
mines ea religione, ea constantia: vt & alios doceant  
manere in officio & vocatione sua, & ipsi pedem in vna  
fede & quasi in vestigio ita figant: vt vagari discurrerèq;  
desinant. Iuxta illud: Sedebit solitarius & tacebit. quod  
idem est ac si dicat: Sedebit Monachus. Nam solita-  
rius Græcis est ὁ μονάζων: si enim sedebit, ergo non dis-  
currerit neque fluctuabit. Cauere enim oportet Mona-  
chos, ne sint tales, quales Regula Sancti BENEDICTI vocat  
Gyrovagos. Et sicut præcipit sapiens: Ne sint illis cre-  
aturæ DEI in tentationem, & in muscipulam pedibus il-  
lorum. Cæterum factus est Esau, vir gnarus venandi &  
homo agricola: Iacob autem vir simplex, habitauit in  
tabernaculis. Habes in sæculo multa millia laicorum,  
qui cum Esau feras agitant & rusticantur: habes nobi-  
les viros, armis & venabulis intentos: habes & ciues, qui  
mercaturæ lucrisq; sunt addicti: habes & agricolas, in  
terra colenda pascendisq; pecoribus occupatos. Sunt  
in seculari libertate & in domibus regum, qui mollibus  
induuntur: qui tanquam Esau pilosi sunt: qui voluptati  
se dediderunt. Sicut enim Ana nepos Esau, inuenit a-  
guas calidas in solitudine cū pasceret asinas Sebeon  
patris sui; Hus autem & Aram fuerunt Duces horreorū:



ita inter viros seculares, præsertim in ciuitatibus & in domibus opulentis sunt, qui circa horrea occupantur, qui aceruos numorum & frugum congerunt. Et vbi abundauerint opes, sunt qui aquas calidas querant, hoc est: qui sectentur voluptates, & corpori cuticulæq; indulgeant, & asinas patris sui pascant: hoc est; in ocio, pigritia & luxu viuunt, indulgentes Genio. His omnibus rebus abundat mundus, horum omnium copia est in familia & posteritate Esau. Sed Iacob est vir simplex, & habitat in tabernaculis. Det omnipotens DEVS, vt nos quoq; qui in istis latebris, in his tabernaculis Iacob delitescimus, simplicitatē quoq; illius imitemur. Habitamus in his castris & papilionibus DOMINI; vtinamq; ita habitemus in his castris, vt strenuos CHRISTI milites decet; & ne nos attingant seculi contagia, ne cupiamus redire in Ægyptum recordati ceparum & alliorū. Et cū iam DEO adiuuāte superauerimus mare rubrū, demerferimusq; hostem persequentem; ne amplius adspiremus ad Pharaonem, ad Nilum, ad crocodilos, ad monstra, ad muscas & ad ranas, & ad Angelum percussorem, & ad mortes hominum & pecorum, ad figlinas, ad opus latericium; & ad sæuissimos exactores, operum præfectos. Bonum est nos hīc esse: bonum est nos imitari in isto monte DOMINI disciplinam Moſis: Heliae seueritatem: bonum est transfigurati IESV CHRISTI gloriam contemplari, & niueum candorem, & solare iubar faciei speculari: bonum est adhærere Patri Basilio: bonum est merere sub Patre BENEDICTO: bonum est

sub

sub TE ARCHIEPISCOPO & ABBATE stipendia facere.  
Primogenita comparamus cum Iacob; nolumus indulgere ventri & palato cum Esau: valeat voluptas, valeat mundus cum suis laüticiis, valeat pulmentū cum coctione hac rufa, pro qua cōmutauit Esau prerogatiuam suam & ius primogenituræ: contenti sumus conuictu isto, horreolo isto, foculo isto & cellula ista, quam nobis antecessor TVVS, & ABBAS olim noster emensus est: modò auaricia & inuidia secularium hominum procul abfit. Porro, duarum quoq; filiarum Pater es, Antistes Reuerendissime; Mariæ videlicet & Marthæ: duarum vitarum Inspector & Rector: Marthæ quidē comparamus Ecclesiam TVAM Metropolitanam LEOPOLIENSEM; vbi TIBI in Terris Russiæ, in Archidiœcesi LEMBVRGENSI, in Ecclesiis item Cathedralibus, Parochialibus, Preposituris, Monachiis &c. tanquam in amplissimis pascuis copiosissimi greges, innumeræ oues, & animarū plurimi coetus & agmina pascuntur: Et vt Pagani Poetę verbis vtar.

*Mille tuæ Latius errant in montibus agnæ.*

Non solū enim sacerdotibus Domini præes, quibus particularis de animabus sollicitudo concredita est; verū etiam laicis; id est popularibus, in medio seculo versantibus. Non his tantū, qui eleuant puras manus, ad orationem & ad iuge sacrificium agni immaculati; sed iis quoq; qui admovent manus ad gladium & ad aratrum, & qui aliquando respiciunt retrò, & sepeliunt mortui mortuos suos, qui villas comparant, qui iuga



boum emunt, qui vxores ducunt, qui ad cenam DOMINI  
venire cunctantur: & nisi vehementius instes, non cu-  
rant & contemnunt. Vitam istā actiuam & laboriosam  
quæ secularis appellatur, cui præes Episcopus & Sacer-  
dos DOMINI magnus, magno Doctorum cōsensu repræ-  
sentat Martha illa CHRISTI seruatoris nostri hospita,  
ad culinam & focum relegata, satagens circa frequens  
ministeriū, & conquerens de ocio sororis suæ. Cæterum  
Maria soror Marthæ, quæ sedebat secus pedes Domini,  
auidissimis auribus verbum eius excipiens, vitæ con-  
templatiuæ typum gerebat: Ordinis & instituti nostri  
Magistra erat; Ecclesiamq; istam solitariam seu mona-  
sticam significabat: in quam relegantur illi, qui nunciū  
remiserunt mundo & omnibus pompis eius, & quibus  
nihil est prius & antiquius, quā PEDES IESV & salu-  
tare Verbum illius: ideoq; optimam partem elegisse di-  
cuntur, vt potè eam, quæ nunquam ab illis est auferenda:  
huius vitæ speculatricis atq; meditatricis, nos esse voto  
& iuramento adstrictos cultores, agnoscimus. In hoc lo-  
co, in hac spelunca Beati Petri lapsum suum deflentis; in  
hoc antro Sancti Patris nostri BENEDICTI, mundi va-  
nitates exosi; in hoc nemore, in hoc oratorio habita-  
mus: hîc Te magno desyderio expectamus: hîc Te  
maxima cum læticia primū videmus, cum sinceraq;  
spiritus exultatione salutamus. Te PATREM nostrum re-  
cognoscimus: nosq; & nostra omnia (si modo Mona-  
chus aliquid sui habet) tibi dedimus & commendamus.  
Tibi nostra paupertas, Tibi nostra humilitas, Tibi no-

stra

stra obedientia, Tibi nostra patientia, nostri mores, nostra deniq; vita curæ sit. Magna & multa paternæ caritatis experimenta dedisti, in Archiepiscopatu Leopoliensi: prædicat benignitatem Tuam Clerus & omnis ordo Sacerdotalis: admiratur virtutes Tuas populus: vniuersus grex fidei Tuæ cōmissus, audit vocem Tuam: insistit vestigiis Tuis. Nominis Tui celebritas & virtutum excellentia obtinuit; vt tibi crederetur altera Ecclesia, altera filia, & altera congregatio. Venisti in possessionē tabernaculorum Iacob: delata est tibi etiam recusanti, Abbatia Sieciechouiensis: Tibi celsit Conuentus iste Monachorum adspirantium ad perfectionem, & militantium sub Regula ista, & sub legibus à Diuo BENEDICTO præscriptis. Imposita est capiti Tuo duplex insula; duæ Prouinciæ Tibi delegatæ sunt; duplex onus moliris. Alterius difficultatem iam expertus es: alterius verò nunc faciendum est periculum. Venisti in locum solitarium, ad paucos Regulæ sanctæ professores; sed ad eos, qui perpetuum bellum indixerunt Acheronti: vbi ad singulare certamen prouocatur diabolus: vbi tentatio certior, & acrior, & prolixior: & vbi semper & exproffesso statur in acie: vbi corona multo sudore quaritur: vbi victoria gloriosius reportatur: vbi surgitur facilius, medicina apponitur efficacius, & vulnus ad cicatricem redit citius; alligante Samaritano, & vinum oleumq; infundente. Veni ergo Pater ad filios: veni Abbas, ad Monachos: veni Tutor ad pupillos. Agnosce Pastor gregem tuum: agnosce parens tuam in CHRISTO pro-



lem: agnosce huius domus Dei familiam: agnosce tessera-  
ram & insignia Sancti Benedicti: vtinamq; recognoscas  
in nobis, & characterem vitæ Regulæq; illius. Si Pater  
es, certè debes Paternam caritatem filiis: si germanus,  
in CHRISTO PATER es, ergo non vitricus: si Pater es, er-  
go non tyrannus. Quòd si nos sumus filii familiæ, ergo  
sumus in patria potestate; ergo tibi debemus & habe-  
mus summum honorem; ergo tibi debemus humilita-  
tem & obedientiam. Si filij sumus, ergo non priuigni:  
si filii sumus, ergo non mancipia; sed Te optimo iure, &  
sponte, & meritò diligimus: si iuxta Regulam legisla-  
toris & Patris nostri DOMNVS & ABBAS, ergo tibi de-  
bemus & timorem; sed amore filiali temperatum. Ab-  
bas, vt asserunt linguarum periti, in Syriaco sermone  
Patrem sonat; sed non sine filiali blandimento, non sine  
puerili grata illa dulciq; balbutie, non sine liberorum li-  
beraliter educatorum modesta fiducia: vt sciamus hanc  
vocem vnà cum religiosis & monasticis institutis, de me-  
dia Syria profectâ esse; vbi sanctus Ephrem Syrus Edesse-  
nus, & alii vetustissimi Patres desertam solitariamq; vi-  
tam professi sunt. Hanc vocem retinere maluerunt La-  
tina Romanaq; monasteria, quàm vocabulum Græcum.  
Apud Græcos enim Præfectus monasterio, etiamnùm  
vocatur Archimandrita. Ille autem quem nostra Asce-  
terea Priorem appellant; Græcis ferè ἡγούμενος dicitur:  
quibus nominibus etiam Roxolani in suis Mandris v-  
tuntur. Nam Abbatem, Græcorum more Archiman-  
dritam vocant; & Priorem corrupta voce, Humenem;

vel

vel, vt alii doctiores, Ithumenem vocitāt. Iſta conſuetudo & nomenclatura Græcorum, quamuis non abhorreat à reipſa, & Scripturæ ſacræ ideā in pleriſq; locis delinea- ta: tamen Latini Syrum nomen maluerunt. Nam Græcis, Mandra: & Speluncam, & ouile, & Proſeuchon ſeu manſiunculam Eremiticam, ſignificat. Quia Patres antiquiſſimi & Anachoritæ, qui ſeceſſerant à mundo; vitam ſeueram ac tristem ducebant, in ſpecubus & in ſylueſtribus latibulis: quemadmodum non ſolum noui; verūetiam veteris teſtamenti Patres factitāſſe videmus: vt Moysen in deſertis Arabiæ; & Heliam in Carmelo Phœnices promontorio, mari imminente; & Ioannem Baptiſtam in vaſta Hierichuntis eremo, iuxta fluentia Iordanis; & CHRISTVM Aſſertorem noſtrum, in deſerto vexatum à Sathana; in monte Thabor immutatum, & in monte oliuarum ſepiùs orantem: qui ſe vulpibus & auibus pauperiorē dixit, nec ſibi ſuppere locum, vbi pedem ponat, & vbi caput illud longè ſacra- tiſſimum reclinet; ſic etiam non paucos Martyres, & Monachos, & Monaſtrias: inter quas Mariam Magdalenam, Martham, Sanctam Aphram, Mariam Ægyptiacam, B. Paulum Eremitam, B. Baſilium, & B. Patrem & Antefignanum noſtrum Nurſinatem illum ſenem D. Benedi- ctum, qui in horrido illo Italiæ loco, cui Sublacui nomen eſt; in latebra montis, auſteram & anguſtam vitam duxit. Hanc vitam diſertè graphiceq; deſcripſit D. Paulus in Epiſtola ſua ad Hebræos, quando ita ſcribit: Sancti viri circumiuerunt in melotis, in pellibus caprinis



prinīs; eēgentes, angustīati, afflīcti; quibus dignus non ē-  
rat mundus: in solitudinibus errantes, in montibus &  
speluncis, & in cauernis terræ. Hæc D. Paulus. Ad quē  
locum respexisse videtur ille, qui primus apud Græcos  
Monasteria vocauit Mandras; & Abbates Archimandri-  
tas, id est speluncæ vel caulæ præfectos. Nam & illos,  
qui primi Monasteria condebant, videmus imitatos es-  
se; non palatia regum, non atria principum; sed cauer-  
nas & specus, in montibus & petris: vel humana morta-  
liq; manu excauatos: vel naturaliter exesos, & sine artis  
ope natos. Inde illa in antiquissimis monasteriis humi-  
litas ædificiorum, angustię fenestrarum, demissi postes,  
depressa laquearia, lumen parcè immissum, loci solitu-  
do, homines facie deiecta, mores verecundi & similes  
attonitis. Hīc sermonis raritas, vocis silentium, nutus  
pro verbis, vestis atrata & promissa; vsui magis, quā  
elegantię subseruiens: in vultu tristis seueritas, corpus  
aridum, ioci nulli, lacrymæ suspiriaq; crebra, cibus ad  
naturam non ad voluptatem, liberalis tamen; ita vt fili-  
os, non seruos ad mensam dicas accumbere, & gratias  
agere Deo non esurientes: vt sit temperantia non fame-  
lica, & sobrietas non sitibunda. Denique, Monasteri-  
um quā proximè accedere debet, ad similitudinem  
conuictus Eremitici, & veteris illius ἀναχωρήσεως: vt se Mo-  
nachi, non in domibus Regum viuere meminerint; sed  
velut antricolos τρωγλοδυτας quosdam, in speluncis agere  
æuum: & se non mollibus vestiri; sed cilicio, sed pilis  
camelorum vexatos & attritos esse oportere. Hæc ideo  
dico;

dico; non vt mihi, & fratribus aliquid arrogem, vel de  
monastica humilitate minùs humiliter cogitem, magis  
eam fortasse verbis iactans, quàm factis exprimens; sed  
vt ostendam id, quod proposui. Rectè quidem à Græ-  
cis appellari Archimandritas, clauistro religiosorum præ-  
fectos: est enim ista vox Eremiticæ modestiæ plena, vt  
sæpè recordaremur non in Capitolionos, neque Sardis  
in Regia Cræsi, neq; Romę in domo Neronis aurea, neq;  
in aula superbi Principis habitare; sed velut in lustris &  
in cubilibus animalium, quasi vermes non homines, &  
quasi iumenta domini, soli Deo & virtuti vacare: Istud  
tamen nomen, quantumuis è re natum, Ecclesia sancta  
Romana rariùs vsurpat: (tamen si in legibus, præsertim  
in Codice Iustiniani semel atq; iterum legatur:) nempe  
vsus religiosorum obtinuit, vt Abbates, id est; Patres po-  
tius dicatur. Sic em̃ illos vocat Regula sacra, & DOMNOS  
& ABBATES. Aliã autem rationem eius rei non video, nisi  
quòd Ecclesia Romana prætulit quodãmodo, caritatem  
humilitati. Humilitas enim sine caritate, Hypocrisis est:  
caritas autē teste Apostolo, non inflatur. Archimandrita  
humilitatis vocabulum est, Abbas verò caritatis, & eius  
quæ ad omnia utilis est, pietatis. Hoc Tu nomen Reue-  
rendiss. ANTISTES vnà cum affectu Paterno, vnà cū pietate  
& amore induisti. Huic Te Monasterio, huic antro Spi-  
rituali gratia Dei præposuit; in quo homines & iumen-  
ta saluabit DEVS, id est, in quo nobiles & ignobiles, ge-  
nerosos & plebeios, pusillos & magnos, doctos & indo-  
ctos, Philosophos & idiotas, Græcos & Barbaros Regu-



la sacra coarctauit: vt non gloriatur sapiens in sapientia sua, fortis in fortitudine sua, diues in diuitiis suis. Sed gloriatur in eo; qui reuelat magna paruulis, & abscondit ea à sapientibus: qui eligit ea quæ stulta sunt mundi, vt confundat sapientes: & infirma mundi eligit, vt confundat fortia: & ignobilia contemptibiliaq;,, vt destruat ea quæ aliquid sunt. Hanc domum Tu Præsul & Abbas volens & propitius ingredi: obedientiæ, continentiæ & omnibus virtutum choris dedicatam: amplectere hanc solitudinem ab Angelis Dei frequentatam: ingredi hanc portam Domini per quam conuersi ingrediuntur. Hæc porta remittit mundo, quæ mundi sunt; & intus illa coërcet, quæ semel Deo consecrantur. Hæc porta ita angusta est; vt per eam non possit ingredi tumor & fastus: non potest ingredi Gigas, & Centaurus, & Goliath; nisi fiat quasi modò genitus infans, lac concupiscens. Et facilius ingreditur camelus per ansulam acus, quàm diues & superbus per hanc ianuam. Per hanc portam foras non exeunt, nisi serui fugitiui, nisi oues infectæ scabiosæq;,, nisi verberones & apostatæ; qui vapulando nihil profecerunt, qui eiiciuntur è domo Dei, quasi membra contagiosa & insanabilia, nisi periuri & apostatæ, nisi sues redeuntes ad volutabrum, & canes reglutientes vomitum, nisi conscientia cauterio inusta: exeunt quidem & boni per ianuam istam: exeunt & filii familias; sed nec sæpè, nec iniussu patris, nec frustra temereq;,, nec diutius absunt, nec longitius: verum eo tantum tempore, cùm sanctæ obedientiæ necessitas poposcerit,

poposcerit, cū hospitalitatis iura flagitauerint, cū  
 gloria Dei proximiq; salus & profectus euocauerit, cū  
 pietatis & religionis causa vertitur. Hæc igitur Porta  
 Domini est, iusti intrabunt in eam: detq; DEVS omni-  
 potens; vt nihil intret coinquinatum. Et sicut in Scho-  
 la Platonica scriptum esse fertur: Ἀγνομέτητ' ἢ ἔσιτω. Ita &  
 hīc rectè scribi possit. ὁ βέλγλ' ἢ μεμιασμέν' ἢ ἔσιτω: Pro-  
 cul ὁ procul este prophani. Deo & tibi custodiui-  
 mus istud castellum, istam visionem pacis. Ipse Dominus  
 confortabat seras portarum eius, & benedixit in ea fili-  
 is & ciuibus eius. Posuitq; terminos illius pacem. Ti-  
 bi à Domino patefacta est, porta hæc; non aliunde ve-  
 nis, per ostium intras, aperuit tibi ostiarius. Ingredere  
 Præsul Amplissime; Intra Pater pientissime; Veni orare  
 cum orantibus, flere cum flentibus, gaudere cum gau-  
 dentibus, & humilibus te accommodato. Stabimus in  
 domo Domini, eleuabimus manus nostras in sancta &  
 benedicemus Domino. Agnosce, agnosce nomen Ab-  
 batiale, dulce nomen Paternum. Alsuesce vocari pa-  
 rens, ne detesteris accessionem noui tituli. Si ABBAS es,  
 si recipis nomen Syriacum; ergo recipe & Latinum: pa-  
 tiaris te appellari τὸν πατέρα τὸν φιλότεκνον: incipias audire  
 Pater, quod etiam nomen suggerit credentibus SPIRI-  
 TVS CHRISTI; vt erumpant in illam vocem fidei &  
 amoris, ABBA PATER: sic DEVM ipsum compellamus, sic  
 & Te compellabimus. At Tu pro Tua innata ingenii  
 bonitate, pro Tua pietate & clementia, pro Tua functi-  
 one tam sancti muneris, non aspernaris, neq; asperne-



beris vnquam huius amicissimi, & naturæ pietatiq̃ue  
conuenientissimi nominis dulcedinem. Multos inue-  
nire licet in seculo; qui Principes, qui Pótifces, qui Dó-  
mini salutare volunt: Paternum autem nomen; vel non  
admittunt, vel cum rubore & fastidio admittunt. Næ  
illi vehementer errant, & similes omninò videntur esse,  
patribus adulteris; qui extra leges connubii procreau-  
runt naturales filios, qui nóthi vocantur; ex occulto ve-  
titoq̃; congressu satos. Remotis enim arbitris, & audi-  
ente nullo, blandiuntur secretò; & fœminis, quarum  
clandestina consuetudine vsi sunt; & earum filiis, quo-  
rum se patres esse libenter susurrant; conscientia præte-  
ritæ voluptatis & succesu fraudis delectati. At si verò pa-  
lâm & præsentē populo, patres à spuris appellentur, e-  
rubescunt, euntq̃; inficias, ac delirare vel iocari pueros  
dicunt: præsertim si ipsi pueri deformes, aut fatui fue-  
rint. Quemadmodum de Pane & Mercurio fabulatur  
Lucianus. Quando enim DEVM, formosum cum primis  
& eloquentem appellat patrem Satyrus, partim homo  
partim caper, cornibus & vngulis repræsentans hircum,  
deformitate odorisq̃; tædio pœnitendum: illud respon-  
sum reportauit à Mercurio ἢ προσομι μὲν, ἢ φιλοφρονεῖ πατέρα δ'  
ὄρα μὴ καλέσῃς με αἰσχροντος ἢ τινός. Patitur adiri prensariq̃; Deus  
à deformi filio, & barbam sibi quoque velli, modò se  
patrem non appellet præsentibus & audientibus arbi-  
tris. Sic etiam illi Pontifices populo DEI præpositi, cum  
dotem Ecclesiæ matris capiunt, cum fruuntur, cum sub-  
ditorum opera exigunt, cum redditus annuos cogunt,  
in locu-

in loculosq; secretò congerunt; benedicunt matri, &  
 agnoscunt vtilis filios. Vt verò locupletiores facti fu-  
 erint, tædet eos atq; pudet nominis Paterni: dedignan-  
 tur à sordida paupereq; plebecula parentes appellari,  
 imò ne Sacerdotes quidem vocari patiuntur; vehemen-  
 terq; peccabis & offendes; nisi Dominos, Clementi-  
 ssimos, & Celsitudines, & splendores, & fumos, & me-  
 ra tonitrua post vnumquodque verbum crepabis.  
 Talium Episcoporum, vt apud Te liberè filialiterq; lo-  
 quar, plena sunt omnia. Sed Tu Reuerendissime An-  
 tistes, publicè claraq; voce inauguratus es, & Abbas  
 noster solenniter acclamatus. Liberi Tui sumus, ex li-  
 bera nati, patrimi & matrimi: Saræ posterì sumus non  
 Agar: iam nos & priuatim filios voca: iam nos benignè  
 paternèq; appella. Dabimus equidem operam, Ponti-  
 fex optime & ABBAS, multa spiritus lenitate præstans;  
 ne nomen Tuum Paternum dehonestemus, ne gratia &  
 pietate Tua abutamur, & ne Te nostri vnquam tædeat  
 pœniteatue: omnibus modis enitemur, vt filii sapientes  
 lætificent patrem, & ne filii stulti & insipientes, contri-  
 stent matrem. Contendemus imitari prudentiam; si nō  
 Philosophorum, at certè serpentum, & simplicitatem  
 columbarum, & prouidentiam formicarum. Tibi su-  
 biiciemur, Tibi obediemus, Te obseruabimus, Tibi  
 auscultabimus, genibus tuis aduoluemur, Te veniam  
 poscemus, in hac domo Dei, in hoc phrontisterio  
 ἐν τῷ ἀγῶνι τῆς πόλεως De quo Aristophanica illa rectè vereq;  
 dici possunt:

ἡμεῖς σοφῶν τὰ τ' ὅτι φροντισήσιν



Verè enim hîc est schola, & cûria, & cõnuentus animarum sapientum, quæ mundum perosæ, cælum quærunt. Te perpetuò venerabimur in hoc Cœnobio, in hac sede & fundo Sethæi quondam gloriosissimi Comit̃is, in quo loco nunc est terra sancta, solum Deo consecratum, fundus B<sup>m</sup>æ Virgini matri Theotoco, & myriadi Sanctorum CHRISTI militum dedicatus, ager beatus & frugifer, antiquus patrum & fratrum nostrorû altor, familię S. BENEDICTI vetus hospitium. Sed libet istius clari, celebris atq; vetusti Monasterii situm altiùs repetere: vt te Reuerendissime Antistes, in amorem loci tam sancti, & amœni, ac religiosi alliciamus. Neq; laudabimus inanes fumos, quemadmodum de Vlisse dicitur, qui Patriæ suæ *Ἰθάκην* luculentiorẽ esse dixit igne alieno; sed veras & genuinas naturæ dotes istius loci breuiter attingemus: quæ partim ad hominũ vtilitatem; partim ad quietem religionis; partim ad incolentium amœnitatem pertinent. Quando quidem videmus & Beatissimum Patrem Diuum Bernhardum, Monasterii sui Claraualensis encomium dixisse, illiusq; Hypographen reliquisse ad posteros. Ita ergo Monasterii nostri Topothesiam ordiemur.

Præterlabitur hunc de quo differimus locum, fluuius in tota Polonia celeberrimus, qui appellatur multis nominibus à populis circumiacentibus. A primis fontibus suis appellatur ab albo colore; Biellawoda: quasi tu dicas, Albula; quod nomen antiquitus impositum fuisse Tyberi fluuiò dicitur, vsq; ad tempora submersi in eo  
cogno-

cognominis; casusq; & fatum Principis pereuntis, occasio fuit nouæ æternæq; nomenclaturæ à Tito Liuiο: sic etiam noster amnis, à principio dictus est, & nunc etiam à plerisq; vocatur, & præsertim à Moscis Biellawoda; ab aqua candida: qualem ferè secum deferre solent amnes magni & violenti, propter obiecti vadi turbulentiam, & limum perpetuò canescentem & albicantem: de quo sic olim lusimus.

*Non procul hinc, ruit indignatus Vistula pontem,*

*Aduena Sarmaticos exedit amnis agros.*

Tandem vicina Germania imposuit nomen flumini cōuenientissimum, Weyffel. Germanos Poloni secuti sunt vocantq; Wisła, albedinis nomine perpetuò seruato. Weis enim Germanicè album significat, vel ut Frisii dicunt, Wis & Wissel. Hinc originem traxit, Vistula, & Istula. Dicitur etiam hoc flumen Vandalus, à nomine Wanda, vel potiùs Węda; quod hamum significat: eò, quòd illi forma seu gratia faciei fuerit, pro allectamento vel irritamento voluptatis, qua inescabantur sicut hamo pisces. Hic fluuius in finibus Silesiæ superioris ortus, per totam Poloniam Minorem, & per finitimos populos commodissimus fertur: horreorum quidem exhaustor & exportator annonæ; sed rei numariæ largus importator, & multarum Gentium altor. Alluit hoc loco Monasterium, propè illius hortos leniter & placidè fluens, & augens loci amœnitatem; pisculentus cumprimis & optimis salmonibus abundans, qui marinis omnibus præferuntur: educat quoq; siluros ingentes (sturiones



riones vulgò dicuntur ) plaustra magnitudine sua im-  
plentes, qui in acetariis asseruati, saporem acquirunt op-  
timum. Nauigia multa & crebra visuntur, quæ secundo  
flumine, remis; aduerso autem velis & ventis aguntur,  
& quæ iucundum deambulanti & meditati spectaculū  
præbent. Cæperat iam hic fluuius vehemenrer subruere  
agros adiacentes, & appropinquare Monasterio, mina-  
riq; muris eluuiem & voraginem certam: sed miserati-  
one Diuina, & auxiliari numine, Beatę Dei Genitricis, in  
cuius tutela istud est oratorium; nec non intercessione  
Sancti Benedicti, aliò est auersus alueus, & ille vetus ac  
periculosus, impletur alluuiione leni, sensimq; deseritur:  
quod fieri cæpit velut auspiciis Tuis, eo sanè tempore,  
cū Tu primū ABBAS noster declaratus ac renunciatus  
esses. Porro in ripa fluminis est nemus, irriguum viridi  
quercu multaq; populo consitum, & quando per tem-  
pus licet, auium concentu lætissimum & salubri frondi-  
um inumbratione gratum. Hoc inquam nemus, vel po-  
tiùs hic sacer lucus, à parte septemtrionali Monasterium  
cohonestauit; iucundus humano prospectui locus, &  
amœnissimum visu quercetum; nisi graculorum, quorū  
ibi certo anni tempore magna vis nidulatur, densis agmi-  
nibus vocalissimoq; strepitu, personaret ac concrepa-  
ret. A Meridie & Occidente camporum est mira plani-  
cies, & magna copia læticiaq; segetum; & in pratis ma-  
gna graminis vbertas; & in syluis non irrita ferarum ve-  
natio; villarum prædiorumq; opportuna propinquitas.  
Oppidum aliquot stadiis à Monasterio distat; à quo &

Mona-

Monasterio & Abbati nomen est. In quo sunt ciues agricolaë, iusti & simplices, rusticis operibus intenti; qui arando & pascendo victum quæritant: fœminæ tristes ac morosæ, pudiciciam seueritate facillè tuentes, & alienæ ab omnibus illecebris viragines: nihilibi scitum, nihil elegans, nihil molle, voluptatis iritamenta nulla: ita, vt religiosus homo præterire possit sine scandalo. Cœnobium ipsum, in secessu iucundo & quieto, prædoni pabulatori; militi, prorsus deuio & insueto. Conuentus in loco solo & incelebri, septus quâ syluis, quâ pomariis. Oratorium structura vetusta, partim lateritia, partim lapide quadrato. Patrona loci, B. Virgo Mater Maria: post hanc, alii præsides fani sunt; decies mille CHRISTI Milites & Martyres. Monachi viuunt sub legibus & instituto D. BENEDICTI, qui fuit ABBAS Montis CASSINI, vita & miraculis clarissimus. Conditor Cœnobii Setæus, in Regno Poloniæ vir suo seculo potens & Illustris: quem postea iuuerunt aliquot Duces & Reges; qui & opus inchoatum consummauerunt, & censum dotem; Ecclesiæ fecerunt auctiorem. Instaurator verò Monasterii, Mathias Riciuolensis, ABBAS, ortu quidem humili, vtpotè plebeius exigui; oppidi alumnus: sed spiritu generoso, nec non erga cultum Diuinum Zelo magno; cuius insignis pietatis multa sunt ad posteros monumenta. Iosephus Wereszczinski Episcopus Kiiouiensis & Abbas Sieciehouiensis prædecessor tuus, quamuis Monasterii conditionem reddiderit multò deteriore, bona; eò pertinentia propemodū



omnia prorsus oneravit, obligavit, & vix non alienavit;  
tamen vel in hoc solo dilaudatur à plerisq; quia rationē  
iniit, qua gloria DEI, conditorumq; ac testatorum salu-  
taris intentio, suo procedat ordine, ministeriumq; sa-  
crum in Ecclesia illa non interfileat; utq; Monachi, ta-  
met si non lautè, honestè tamē & non sordidè alerentur.  
Et ni faceret, omnia desolatum ac dissipatum iri certū  
erat. Neruus est rei Ecclesiasticæ, CONTINUATIO GLO-  
RIÆ DEI; à qua omnibus, præsertim DEO dicatis nun-  
quam cessandum est; ne quando dicatur sacerdoti præ-  
sertim religioso, eoq; magis præfecto aliis. Heus tu  
Vbi fueras quando me laudabant astra matutina? Qua-  
re non interfuisti Angelis & Archangelis, non cessanti-  
bus clamare quotidie SANCTVS? Quare tacebas inter  
illos; cum quibus, & tuas, & adstantium voces admitti  
iubere deprecabaris DEVM? Quare cessabas inter eos qui  
nunquam cessant, non canere tantum, sed tremere &  
clamare, non semel atq; iterum, sed quotidie? Quare non  
prædicasti nec laudasti eum, quem laudant non tantum  
vulgus Angelorum (si modò in cœlo aliquid est vulga-  
re) sed Cherubim quoq; & Seraphim? Quem adorant  
Dominationes, trepidant Potestates? Quare non annū-  
ciasti LAVDEM DOMINI de die in diem? Quare in te sub-  
stitit cursus GLORIÆ DEI, & non traditur per ma-  
nus hominum de generatione in generationem? Qua-  
re hæc non scribuntur in generatione altera, & popu-  
lus qui creatur & creabitur, te cessatore diminuit ac di-  
minuet cultum DEI? Quare laudationes DOMINI  
non

non loquitur os tuum ? Profectò, profectò Reuerendissime Antistes ? inexcusabilis est intermissio Diuinæ laudis, inexpurgabile silentium. Hæc autem detrimenta religionis, hoc læsæ Diuinæ Maiestatis crimen, hanc summam summi numinis iniuriam fieri committiq; necesse fuit in hoc oratorio, si denegarentur alimenta seruus D E I: si propter Prælati sumptus inanes, prorsus interiret patrimonium C H R I S T I: si non suppeditaret huic Monachio corporiq; sacerdotū vnde viueret: si propter militiam & bellicas expeditione, quæ Prælato nostro cordi erant ( quibus alioqui non est res alienior, à vita monastica ) contabuissent fratres fame & frigore. Quæ si accidissent; quod tamen D E V S auferat; iam nunc in hisce locis, soli perstreperent graculi, dilapso sacerdotū choro. Sed hîc finem faciamus, vbi maximè concaluit oratio, quam Zelus domus D O M I N I fortassis æquo prolixior fecit; & vereor quidem, ne turgidiorem, quàm religiosa modestia patiatur. Habes itaq; Reuerendissime ANTISTES, breuē descriptionem Monasterii T v i, cui Te Diuina Prouidentia præfecit. Habes situm illius & commoditatem. Habes statum eius, in quo fuit cū adhuc re incolumi floreret. Habes & eam qua nunc est, conditionem. Habes præterea huius Sytæ vocis A B B A: id est, Nominis Paterni commendationem; in qua maior ferè pars nostræ orationis absumpta est. Ingredere ergò quod bonum, fœlix atq; faustum sit, & præsentem loci fortunam æqui boniq; consule. Accingere & excita Te ad defendendam Ecclesiam D E I, & ad asserendum resti-



tuendumq; CHRISTO, & Sancto BENEDICTO suum  
patrimonium. Vide quomodo posuerunt Sanctuarium  
DOMINI in pomorum custodiam. Nihil est integrum  
nihilq; liberum, nisi hortus iste quem vides, pomis py-  
risq; confitus: omnia possedit mundus, omnia cesserunt  
in vsum seculi. Veni ad liberandum nos : recupera hæ-  
reditatem DOMINI: posside vineam DEI SABBAOTH:  
vt aliquando rebus in integrum restitutis & ad pristinum  
florem reuocatis, hinc respiremus: hinc habitemus: hinc  
soli DEO vacemus & feriemur: hinc vitæ curriculum per-  
agamus: hinc deniq; ad coronam percipiendam feli-  
citer euolemus. Tu nobis præsis, Tu coërceas delin-  
quentes, Tu bonis frugiq; Monachis, in Spiritu sancto  
blandiaris ac dicas. Venite filij audite me, timorem Do-  
mini docebo vos. Et ad DEVM aliquando exclames,  
Narrabo nomen tuum fratribus meis. Nosq; filii obe-  
dientiæ, respondeamus. Loquere DOMINE, quia audi-  
unt serui TVI. Tu nobis præcipe quod bonum est,  
in conspectu DOMINI. Cui soli, qui est Pater ac DOMI-  
NVS Cœli & terræ: qui est Pater luminum: qui est Pa-  
ter DOMINI NOSTRI IESV CHRISTI: qui est PA-  
TER NOSTER, cui dicimus: ABBA PATER;  
sit laus, honor, & imperium, in  
secula seculorum

AMEN.



BIBLIOTH. UNIV.  
JAGELLONICAE

1. 13



m  
m  
m  
v-  
nt  
e-  
k-  
m  
c  
r-  
i-  
n-  
o-  
s,  
e-  
i-  
t,  
i-  
a-  
o  
i  
o  
i  
p  
i  
e



Biblioteka Jagiellońska



sidr0022120



